

## Protocol dalla 4. radunonza generala

Mesjamna, ils 11 da mars 2015 allas 20:00, ella Sala da cultura a Trun

### Tractandas:

1. Beinvegni
2. Approbaziun dalla gliesta da tractandas
3. Elecziun da dus dumbravuschs
4. Approbaziun dil protocol dalla radunonza generala dils 14 da matg 2014
5. Rendaquen ed approbaziun dil quen 2014
6. Preventiv per igl onn 2015/16
7. Rapport dil president
8. Rapports da commembras e commembers da suprastonza
9. Plan d'instrucziun 21
10. Program da lavur
11. Elecziuns
12. Pro Idioms Engiadina
13. Varia

### 1. Beinvegni

El num dalla suprastonza beneventa il president Heinrich Berther cordialmein tuttas amitgas e tuts amitgs dalla Pro Idioms. La gronda preschientscha da varga 250 persunas demuossi che la PI vivi e seigi en cumpleina forza. La PI seigi in cuzzeivel e stabil moviment ell'entira Romontschia, ina forza decisiva el cumbat pil manteniment da lungatg e cultura romontscha. La PI seigi in cumbatent insistent pil moviment idiomatich e per l'applicaziun dil principi democratic dalla politica da lungatg e cultura. la PI vivi e prospereschi mo cul grond susteniment dalla populaziun. En special beneventa el il president communal da Trun/Schlans Dumeni Tomaschett, il mistral dalla Cadi, Donat Nay, deputadas e deputai sco era ulteriurs exponents dalla politica, la delegaziun dalla Pro Idioms Engiadina sut la bitgetta dil president Domenic Toutsch, Urs Cadruvi, secretari general dalla Ligia Romontschia, Vitus Gartmann, president dalla Surselva Romontschia, deputau Luca Tenchio, president dalla cumissiun cantunala per formaziun e cultura. Era als representants dils mieds da massa sco era al chor dalla scola superiura da Danis, che vegn ad embelir cun entginas canzuns la radunonza, fa el in cordial beinvegni.

Avon la proxima tractanda commemorescha il president al car consuprastont Ervin Degonda che ha bandunau nus igl onn vargau muort ina malsogna maligna che ha terminau bia memia baul sia veta terrestre. Sco commember da suprastonza eis el s'engaschus ferventamein pil scopo dalla PI. Sper siu mandat sco deputau era el president dalla delegaziun romontscha el parlament cantunal.

### 2. Approbaziun dalla gliesta da tractandas

La gliesta da tractandas vegn approbada unanimamein.

### **3. Elecziun da dus dumbravuschs**

Sco dumbravuschs vegnan eligi Luregn Caspescha da Schnaus ed Armin Candinas da Rabiun. Sco actuar dalla sera vegn Curdin Maissen eligius.

### **4. Approbaziun dil protocol dalla radunonza generala dils 14 da matg 2014**

Il protocol ei staus publicaus sin la pagina d'internet. El vegn approbaus unanimamein cun engraziament agl actuar Curdin Maissen.

Suenter la tractanda 4 delectescha il chor dalla scola superiura da Danis cun accumpignament instrumental igl auditori cun las bialas canzuns "Unics" da Pascal Gamboni e "Surselva" d'Alexi e Marcus.

### **5. Rendaquen ed approbaziun dil quen 2013/14**

La cassiera Adelina Vincenz presenta il quen. Cun expensas totalas da 23'945.23 frs. ed entradas da 30'117.45 frs. ei seresultau in avanzament dalla facultad da 6'172.22 frs. Ei resta in capital agen da frs. 10'262.03. Ils revisurs Jan-Andrea Bernhard e Paula Casutt confirman ch'il quen seigi menaus en uorden e che las quittanzas seigen avonmaun. Els recamondan d'approbar il quen engraziand alla cassiera. Il quen vegn approbaus unanimamein.

### **6. Preventiv per igl onn 2015/16**

Il preventiv preveda expensas da 53'000.- frs. ed entradas da 43'000.- frs. cun in deficit da 10'000.- frs. Previ ein cuosts da 35'000.- frs. per la cuntinuaziun dil mied da romontsch ACCESS. Numerusas persunas lavuran vid quei mied, e quei gratuitamein. Per quei engaschi admetta la suprastonza dalla Pro Idioms in grond e sincer engraziament. Il preventiv vegn approbaus unanimamein ed il president engrazia grondamein allas commembras ed als commembers dalla PIS pil susteniment finzial voluntari che vegn prestaus.

### **7. Rapport dil president**

Per motivs da temps restrenscha il president Heinrich Berther siu rapport sils suandonts quater puncts essenzials.

#### *A) Plan d'instrucziun 21:*

Il plan d'instrucziun 21 seigi sin palancau communal e cantunal in tema da gronda brisanza. Il Grischun seigi unics cul lungatg romontsch. Il plan seigi fetg dispiteivels, quei che vegni era documentau ellas medias. Ins astgi metter en damonda sch'in plan d'instrucziun, che vegni scaffius sin palancau politic, astgi preveder e circumscriber aschi detagliagliadamein tgei che hagi da schabegiar en scola. Sco il plan seipresenti oz seigi el per gronda part buca applicabels en scola. En tractanda 8 vegni la suprastonta Carin Cadruvi ad orientar pli detagliadamein en caussa.

#### *B) Gruppa da lavur per mieds d'instrucziun:*

Ils 19.11.2013 decida la Regenza grischuna da surdar alla SAP l'incumbensa d'installar ina cummissiun che elaborescha in concept cumplexiv concernent ils mieds d'instrucziun idiomatics. Da quella cummissiun fa era il vicepresidente dalla PIS Francestg Friberg part, el vegn a declarer en tractanda 8 detagliadamein davart il concept e las finamiras dalla cummissiun ed orientar davart il stan da lavur actual.

#### *C) Purificaziun dallas structuradas dalla Ligia Romontscha (LR)*

Muort las structuradas vertentas dalla LR e dallas uniuns afiliadas seigi deplorablamein stau pusseivel als rg-ists d'implantar numerus impurtonts posts da clav cun persunas che promovien il rg per contonscher lur finamiras. A quei cunfar seigi da dar cunterpeisa. Purificaziuns seigien necessarias per garantir el futur ch'il meini dil pievel vegni purtaus da tuts gremis che han cumpetenzas da decider. Ella suprastonza dalla Suselva Romontscha seigi la purificaziun gia succedida, leu representi la suprastonza il meini dil pievel romontsch. En quei connex fa il president attents igl auditori d'eleger tier las proximas elecziuns en dus onns persunas che representien il meini dil pievel en tuts gremis politics e strategics.

#### *D) Mieds d'instrucziun:*

El preventiv cantunal seigi previu tochen igl onn 2020 rodund 3'250'000.- frs. pils mieds d'instrucziun per las scolas romontschas e talianas. Quei denton mo el cass ch'ei vegni entochen 2017/18 buca tier mesiras da spargn specialas ni tier augments da taglia. En quei connex engrazia el als commembers da suprastanza Francestg Friberg ed Adrian Cathomas che han, cun agid da varga 50 collaboraturs (34 scolastas e scolasts, 24 ulteriurs gidonters), demonstra cun ACCESS a moda exemplarica ch'igl ei pusseivel da realisar mieds d'instrucziun attractivs d'aulta qualitad, en fuorma digitala e sin pupi, e quei considerablamein pli favoreivel ch'il cantun.

Suenter il rapport presidial suonda in ulteriur intermezzo musical dil Chor dil scalem superiur Danis cun accompignament instrumental. Il president engrazia cordialmein pil bi cant ch'ei vegnius purschius.

#### **8. Rapports da commembras e commembers da suprastanza**

Ils commembers da suprastanza Tresa Deplazes, Adrian Cathomas e Francestg Friberg informeschan detagliadamein davart ils suandonts temas:

- Rg en scola / rg orda scola - ed uss?
- ACCESS e PLAT-ON, dus products dalla Pro Idioms
- Mieds d'instrucziun idiomatics

*Ina resumaziun dils rapports vegn repartida alla fin dalla radunonza a tuts presents e vegn era aschuntada en quella fuorma al protocol e plinavon messa silla pagina d'internet [www.proidioms.ch](http://www.proidioms.ch).*

Suenter il rapport da Tresa Deplazes referescha Andreas Glaser arisguard il suandont tema: **Rumantsch Grischun ei arrivaus cun las dertgiras alla scienza dil dretg.**

Glaser ei commember dalla direcziun dil center per democrazia ad Aarau (ZDA) e professor per dretg public alla Universitad da Turitg. El ei sefatschentaus da rudien dallas damondas da dretg en connex cul RG e vegn tier suandontas conclusiuns:

- Era sco sperdider tier ina sentenza giudiziala contonschien ins per regla enzatgei. Sch'igl idiom seigi relevants ni buca viers il rg el plan d'instrucziun 21 seigi ina caussa che la politica hagi da decider. Sco exempel concret menziunescha el che la vischnaunca da Trun hagi francau, sco biaras autras vischnauncas romontschas, il romantsch sursilvan sco lungatg uffical ella costituziun. Sch'il cantun vegli exagerar il diever dil rg per las scolas (p. ex. tier examens d'admissiun etc.) hagi mintga persuna singula la pusseivladad da recuorer.

- Il plan d'instrucziun 21 seigi actualmein formulaus a moda fetg nunclara e biaras formulaziuns laschien tier pliras interpretaziuns. Ei seigi impurtont che la politica decida sur da quel e buca ils jurists. El speri ch'ei detti el connex cul plan d'instrucziun buca ulteriurs cass da dertgira.

#### **9. Plan d'instrucziun 21**

La commembra da suprastanza Carin Cadruvi informescha detagliadamein davart il plan d'instrucziun 21 en connex cul rumantsch grischun: "Il cantun ignorescha danovamein la basa legala". *Ina resumaziun dil rapport vegn repartius alla fin dalla radunonza a tuts presents e vegn era aschuntada en quella fuorma al protocol.*

Sin la damonda da Bruno Berther, co ins sappi reagir sch'il cantun sforzi atras il plan d'instrucziun 21 sco previu, rispunda Heinrich Berther sequentamein: Ei detti dus parameters, primo la materia per se, tgei che nus seigien prompts d'acceptar e tgei buc? Il sboz actual vegni refusaus categoricamein dalla PI. Il secund parameter pertuchi la strategia, che porschi differentas pusseivladads d'agir. Ina pusseivladad seigi da pretender ch'il pievel decida davart il plan d'instrucziun, ina strategia prigulusa demai che buca mo la Romontschia sappi votar surlunder, mobein las votantas ed ils votants digl entir cantun. La via politica empermetti dapli

success. Quei pretendi denton che l'entira Romontschia cullas uniuns PIE e PIS sco era la LR cun tuttas uniuns affiliadas discuorien il medem lungatg. Sche tuts hagian ina ductrina unitara seigi la schanza gronda che las pretendiuns dalla PI vegnien risguardadas el plan d'instrucziun 21. Reusseschi ei denton buca alla Romontschia d'esser unitara, vegnien auters a decider sur dil bein- ni malstar dil romontsch. Perquei supplichescha el instantamein tuttas uniuns ed uniuns affiliadas ella Romontschia da secunvegnir per ina strategia.

## 10. Program da lavur

Tenor Heinrich Berther cuntegn il program da lavur entgins projects en process che seigien gia vegni dilucidai detagliadamein ella tractanda 7.

## 11. Elecziuns

Ils dus commembers da suprastanza Curdin Maissen ed il president Heinrich Berther han demissiunau per motivs da temps. Il president engrazia a Curdin Maissen per siu engaschi en favur dil romontsch e dils idioms.

Il president partent dat ina retrospectiva da siu temps sco president dalla PIS, resumada cuortamein sco suonda:

El hagi buca surpriu il presidi per munconza da lavur ed era buca muort ambiziuns da raccoltar arbagias. La motivaziun leutier seigi d'auter origin. La decisiun fallida ch'il Cussegl Grond hagi priu igl onn 2003 en favur dil RG sco lungatg d'instrucziun seigi semussada ella scolaziun sco era ella veta quotidiana sco ina biergna che infecteschi e destrueschi il romontsch. Ina gronda part dalla Romontschia sesenteva enganada dils RG-ists che fagevan cul RG ina ideologia fanatica, intoleranta ed antidemocratica. Cun la fundaziun dalla PIS l'entschatta 2011 hagi el vuliu dar ina vusch al moviment idiomatic, quei surtut el Cussegl Grond ed ella cumissiun cantunala per formaziun e cultura. Era sch'ei eri da quintar cun in cumbat endinau che laschi anavos blessuras, seigi el staus dalla perschasiun ch'ins stoppi frenar cun tuts mieds pusseivels l'impertinenzia antidemocratica dils RG-ists che sbattevan e negligevan sistematicamein tuts avvertiments e segns d'alarm ord il pievel.

El hagi spertamein fatg persenn ch'il cumbat vegni sustenius da biaras personas che mo spitgavan che tal vegni prius si. Varga 90% dil pievel romontsch favoriseschien igl idiom e varga 3000 personas seigen daventadas commembras dalla PIS.

La PIS e la PIE hagian pretendiu cun success in tractament equal pils idioms. Cheutras seigi reussiu da puspei stabilir la muntada dils idioms e da dar ad els era giuridicamein ina renaschientscha che havess atgnamein stuiu secapir da sesez. Quei ei stau pusseivel sulettamein cun formalisar quellas pretendiuns els dus documents impurtonts – il memorandum e la cunvegnientscha da convivenza - che seigien vegni signai dalla PI e dils RG-ists ed en concordanza culla Ligia Romontschia ed il Cantun. Il cumbat communabel pils idioms hagi puspei purtau ina legrevla avischinaziun dalla Engiadina e Surselva, quei che seigi d'appreziar grondamein.

Il president partent engrazia a tuttas commembras ed a tuts commembers sco era alla suprastanza pil sustegn e la confidanza demussai enviars el. La funcziun da president seigi buca mo stada lavur e fastedi. Il pli bi seigi ch'el seigi daventaus in Romontsch aunc pli perschuidiu ch'antruras.

*La retrospectiva cumpleina ei aschuntada al protocol.*

Silsuenter suondan plaids da renconuschientscha per Heinrich Berther e per Curdin Maissen da Francestg Friberg, resumai sequentamein:

Curdin seigi staus ina persuna centrala tier las preparativas per la fundaziun dalla PIS sco era per contactar ed anflar gliedud per ina suprastanza. Denter auter seigi ei era gartegiau ad el da gudignar Heinrich Berther sco president, quei che seigi semussau sco in immens acquist. Che Heinrich Berther, sco persuna politica, seigi staus la dretga ed optimala elecziun demuossa Francestg Friberg perschuidentamein a maun da suandonts treis exempels:

- El decuors dilg october 2011 tochen igl avrel 2013 s'engascha la PIS fermamein per novas votaziuns communalas concernent il rg sco lungatg da scola. La consequenza ei in tiaratriembel historic maisudiu: **17 vischnaucas** che havevan giu introduciu il rg tuornan agl idiom. En Surselva resta sulettamein Trin che mantegn il rg sco lungatg d'alfabetisaziun.

- Ils 08-12-2011 abolescha il CG sia decisiun dil 2003, quei che ha per consequenza ch'il cantun sto puspei edir mieds d'instrucziun els idioms. Il conclus dil Cussegl grond da 2003 ed il conclus dalla Regenza dils 21.12.2004 selaschien buca tener giuridicamein. Il DECA hagi luvrau en connex cul problem RG sin in fundament „illegal“. L'introducziun integrala dil rg ella scola elementara romontscha hagi disgiu („sei gescheitert“). Ina tala decisiun ei mo stada pusseviva grazia alla immensa lavur davos las culissas, lavur da diplomazia, prestada per ina buna part da nies president partent.

- Naven dalla stad 2013 tochen il schaner 2014 inoltrescha la PIS ensemen culla PIE ina intervenziun vehementa al Cantun cun suandonts dus messadis.

a) Constataziun ch'il PI21 seigi inacceptabels quei che pertucca la part romontscha, tala cuntegni tut put rg naven da scoletta tochen al scalem superiur. La PI pretenda ch'il Cantun purificheschi il PI21 aschia che quel corrispundi allas leschas ed allas constituziuns.

b) Constataziun ch'il Cantun semuenti buca en caussa realisaziun da mieds d'instrucziun. La PI pretenda ch'il cantun fetschi siu duer e semetti alla lavur da realisar ils mieds d'instrucziun idiomatics. Varga 40 ulteriuras instituziuns (vischnaucas politicas, conferenzas da scolasts, scolas, uniuns culturalas) sustegnan la PI e scrivan medemamein al Cantun.

Alla testa dil moviment seigi vinavon Heinrich Berther. In politicher tochen giu sil maguol. Co il Heinrich hagi dumignau tut sias acitivitads sut ina capiala seigi beinenqualga stau in legn era pils consuprastonts. Grazia alla savida dil Heinrich, grazia a sia perseveronza ed a sia insistenza seigi gartegiau da dumignar neu fetg bia en quels quater onns. El num dil pievel romontsch admetta Francestg a Heinrich in cordial engraziament pil grond engaschi e per tut sia lavur prestada.

Sco successur da Heirich Berther vegn proponiu ord il miez Lorenz Alig da Siat. El ei commember activ dil parlament dalla vischnaunca da Glion e deputau el Cussegl grond. Lorenz Alig vegn eligius unanimamein sco niev president dalla PIS. Heinrich Berther gratulescha al niev president e giavischa ad el bien maun d'empalar la PIS egl avegnir. Il plaid d'engraziament dil president niev eligiu suonda en fuorma resumada:

La gronda raspada fetschi ad el gronda impressiun ed ei seigi ina gronda honor ed ina nova experientscha da vegnir eligius d'ina tala maioritad. El surprondi quei mandat cun perschuasiun, grond plascher e cun la prontadad da s'engaschar en favur dil romontsch, beinsavend che quei seigi buca ina leva incumbensa. A Heinrich Berther engrazia el pil nunstunclenteivel engaschi en favur dils idioms. Mo units hagien nus la forza necessaria da tschentar tiarms als adherents extremistics d'in lungatg unificau. Pils problems actuals seigien nus responsabels, buca quels da lieunga jastra. Nus e buca ils auters dueigien star stateivels al romontsch e star en mintgadi pils idioms. Il moviment dalla PI hagi fatg surstar ils extremists dil RG, els seigien stai surpri da quella vehemenza che stoppi exnum cuntinuar. Sia finamira seigi da contonscher sil pli pauc 500 ulteriurs novs commembradis per la PIS enteifer igl onn current. Oravontut stoppi la Foppa e la Lumnezia vegnir mobilisada aunc pli fetg. Trer vid il medem sughet ei il motto dil niev president. Il plan d'instrucziun 21 seigi ussa da metter bein a cavegl. In dils guvernagls leutier seigien ils adherents dalla PI. Adina puspei mussar preschientscha tier eveniments romontschs seigi da gronda impurtonza. Lu seigi el pertscharts che nus vegnien a gudignar ils cumbats vegnents en favur dalla faviala idiomatica. El engrazia a tuts per la viva preschientscha ed intimescha da ponderar tgei che mintgin sappi porscher e prestar pil moviment idiomatic.

*Il plaid cumplein dil niev president ei aschuntaus al protocol.*

**Urs Cadruvi, secretari general dalla Lia Rumantscha,** drezza entgins plaids partenent l'elecziun e la demissiun dil president dalla PIS.

Cura ch'el hagi udiu dalla demissiun da Heinrich hagi el buca giu in bien sentiment e ha lu gest numnau el decuors da siu plaid entgins cavazzins daco che quei seigi aschia. Che Lorenz Alig stetti a disposiziun sco successur fetschi ad el grond plascher, perquei che la continuaziun, che seigi zun necessaria, seigi garantida aschia. Nus seigien aunc buca alla fin dil maraton, denton era buca all'entschatta. Sch'el patratgi als davos pèr kilometers che seigien aunc da far en connex cul plan d'instrucziun 21, seigi era da risguardar la gronda lavur fatga tochen ussa:

- Il memorandum, che seigi vegnius realisauus 2012 e che seigi quasi naschius sur notg, hagi giu in grond intent sco model da coesistenza, numnadamein da rimnar las duas varts extremas che levan saver ina da l'otra insumma nuot, per aschia formar ina opiniun. Quei impurtont document seigi mo staus pusseivels entras ideas e patratgs strategics, e buca il davos entras calcul e tactica politica da Heinrich.

- En connex culla revisiun dalla lescha da scola che steva avon porta seigi quei document, che reuneschi ils meinis, staus da gronda impurtonza, pertgei mo aschia seigi stau pusseivel da dumignar tuttas 11 commembras e commembers dalla CFC (cumissiun per formaziun e cultura), nua che Heinrich Berther fageva era part, ad ina opiniun. Quei pass zun necessari hagi effectuaue che la regenza cantunala hagi saviu dessister da sia proposta che cuntenevi neginas allusiuns d'insumma enzacu saver stampar mieds da scola idiomatics.

- Quei pass seigi staus la premissa ch'il CG hagi insumma saviu tractar quei artechel. Era cheu hagi Henirich fatg gronda lavur.

- Il proxim pass ei stau la fundaziun d'ina gruppa strategic-politica, nua che personas prominentas romontschas pro e contra RG han fatg part. Leu seigi ei iu per concretisar e definir il process dil model da coesistenza per allura presentar a cusseglier guvernativ Martin Jäger ina via pusseivla per agir vinavon. Martin Jäger hagi denton vuliu saver nuot dallas propostas da quella gruppa e seigi entraus en negins puncts. Sin fundament da quella terrada hagi la LR fatg clar a M.J. che la LR sappi buca pli influenzar quei che capeti vinavon.

- In da quels puncts segi stau la proposta, ch'el, Martin Jäger, dueigi exnum incumbensar ina gruppa operativa nua che commembers dalla PI e dalla LR seigien era presents, per elaborar en detagl co il Model da coesistenza sappi haver vigur en scola en ina fasa transitorica, savend ch'il plan d'instrucziun vegni aunc ditg buc ni insumma buc. La malcuntentientscha seigi gronda ed il temps cuori. Tenor M.J. seigi il plan d'instrucziun 21 sin via e la gruppa che seigi responsabla per implantar il model d'existenza vegni a planisar quei. Tgei che seigi vegniu ora hagian ins viu, il PI 21 seigi totalmein surcargaus cun RG. La LR seigi era buca cuntenta cul resultat e hagi tutta capientscha ch'ei tonschi ussa per la PI. Ins possi buca pli, ins hagi piars la confidanza, quei messadi hagi la LR era fatg al departament. Che la voluntad seigi buca pli cheu d'implementar il model da coexistentia sco el era patertgaus oriundamein, capeschi en vesta al fatg da tut quei che seigi marschau tochen ussa.

Sin fundament da tut quels fatgs hagi la LR formulau detagliadamein, en dialog cun la PI che hagi analisau il PI 21 minuziusamein, tgei che vegni pretendiu pil PI21. Sin fundament dils signals da Cuera seigi el perschuadius da saver contonscher quei, pertgei la situaziun seigi madira ed il departament vegli buca far propostas senza che la LR stetti davostier. E la LR vegli era buca far quei senza che la PI seigi d'accord.

A Heinrich Berther engrazia el per la gronda lavur ch'el prestada, pertgei el seigi staus il grond motor che hagi capiu da purtar vinavon quei moviment cun unitar las forzas. Grazia ad el seigi insumma stau pusseivel da far midadas, perfin ellas retschas dalla LR, quei ch'eri avon probabel strusch pusseivel. Sco engraziament special regala Urs Cadruvi a Heinrich sco pre-premiera la nova clavina dalla LR che ha ina outra muntada che la veglia.

La tractanda 11 cuntinuescha cullas elecziuns dils successurs per Ervin Degonda e Curdin Maissen. Ord il miez vegnan proponi Susi Spescha da Pigniu ed Elisabeth Bass da Surrein. Omisduas dunnas vegnan eligidas unanimamein sco commembras novas dalla suprastonza. Ils suprastonts veders vegnan medemamein reeligi en globo cun in grond applaus.

## 12. Pro Idioms Engiadina

Il president Heinrich Berther surdat il plaid a Domenic Toutsch, il president dalla Pro Idioms Engiadina che porta ils salids dalla delegaziun engiadinesa. El engrazia alla Pro Idioms Surselva pigl invit e per la ordvart buna collaboraziun sin basa amicabla.

En siu plaid pren Domenic Toutsch sut la marella puentadamein ils excuors politics ed intransparentes dalla Rumantschia, el tematisescha il plan d'instrucziun 21 e raquenta entginas historiettas sur dallas medias. Tgi havessi detg igl onn 2010 che:

- la PI hagi gia igl onn 2011 en Surselva ed ell'Engiadina bunamein 5000 commembras e commembers?
- ch'il regent Martin Jäger communiccheschi la stad 2011 "Die heutige Praxis für die Produktion der romanischen Lehrmittel lasse sich rechtlich nicht aufrecht erhalten"?
- ch'ei seigi pusseivel ad ina societad privata da producir mieds d'instrucziun illegals senza consequenzas giuridicas e sco punct culminont schizun vender tals al cantun?
- che tut las vischnaucas dalla Surselva (cun excepziun da Trin) e dalla val Müstair tuornien tiegl idiom?
- che treis presidents dalla PI seigien el Cussegl grond (che tuts treis appartegnien ad in'otra partida seigi mussament avunda che la PI seigi ina causa dil cor e buca da partida)?

A Cuera hagien ins installau in prigus sistem da nepotissem. La LR, igl RTR, igl incumbensau da lungatg tiel cantun Grischun, la regenza grischuna ed il departament d'educaziun, la pressa cantunala seigien secasai a Cuera e tuts protegien in l'auter. Negin interesseschi tgei che marschi ella Rumantschia. Ei vegni manipulau entuorn en favur dalla lingua panaschada cun strubegiar vid il plan d'instrucziun 21 e quei tut cun la benedicziun dalla regenza. Lezza hagi nuot pli perdet da far che da fabricar in niev plan d'instrucziun che pretendi cumpetenzas els idioms ed en RG. Tuttas discussiuns e pretensiuns dils davos onns ella Romontschia vegnien ignoradas e la pressa romontscha fetschi la giata morta. Alla fin gratulescha Domenic Toutsch al president nieveligiu Lorenz Alig ed allas novas suprastontas. El engrazia a Heinrich Berther per la buna collaboraziun durant ils quater onns vargai ed era per la buna collaboraziun denter las uniuns PIS e PIE.

Il president Heinrich Berther engrazia a Domenic Toutsch pils salids ord l'Engiadina.

## 13. Varia

**Vitus Gartmann, president Surselva Romontscha** ei impressiunau dalla gronda preschientscha che muossi attaschadad, respect ed engraziament enviars la suprastonza dalla PI. La ferma unitad colligi las valladas romontschas pil moviment idiomatich che sappi contonscher cun sia solidaritad extraordinaria las finamiras dalla PI. La Romontschia seigi gia daditg unita, ei disgeschi denton tier las estructuras politics e tier differents politichers che respectien ed acceptien aunc adina buca varietad en tiara romontscha. Fussien quels units cun la basa romontscha ed ademplessen lur obligaziuns sociolinguisticas, fussien las finamiras dalla PI daditg contonschidas. El engrazia a tuts presents, specialmein a Heinrich Berther pigl engaschi en favur dils idioms.

**Luca Tenchio, deputau e president dalla cumissiun per formaziun e cultura** engrazia a Heinrich Berther per siu grond engaschi ella cumissiun da formaziun, nua ch'el defendi ses interess per formaziun e cultura. Al president nieveligiu gratulescha el. Lorenz Alig seigi in excellent cusseglier che vegni prius serius a Cuera. La gronda sfida dalla legislatura currenta vegni segiramein il plan d'instrucziun 21 ad esser. Ei seigi impurtont che las vischnaucas sappien era el futur decider partenent il lungatg en scola. L'autonomia dallas vischnaucas en damondas da lungatg astgi en negin cass vegnir periclitada entras pretensiuns faulsas el plan

d'instrucziun 21. Ei vegni a semussar tgei propostas che la regenza porti pil plan d'instrucziun, sco ei vesi ora ussa seigi pil mument buca da malegiar il giavel vid la preit.

Alla fin engrazia il president Heinrich Berther alla vischnaunca da Trun che ha mess a disposiziun las localitads e l'infrastructura per la radunonza generala. Allas 23:15 siara el la radunonza ed envida tuts presents ad in refrestg.

Rabius, ils 23 da matg 2015,  
Curdin Maissen